



Inatsisartuni ilaasortaq  
Sara Olsvig, Inuit Ataqatigiit  
/Maani

**Issittup imartaani HFO pillugu § 37 naapertorlugu akissuteqaammut nr. 153-2018-imut akissut**

Asasara Sara Olsvig

11. juli 2018-imi Issittup imartaani uulia kinertoq (HFO) pillugu Naalakkersuisunut apeqquteqaateqarputit. Apeqqutit uannut akisassanngorlugit innersuunneqarput.

**1. Naalakkersuisut issittup imartaani uuliap kinertup atornerarnerata annikillissarnissaanut nunat tamalaat akornanni, soorlu IMO-mi, suliniuteqarnermut isummersornerat sumut killippa?**

Naalakkersuisut suli Imartatsinni Heavy Fuel Oil-imik (HFO) atuineranut inerteqquteqarnissaq pillugu isumminngillat, Issittumi HFO-mik atuineranut assartuussinermullu inerteqquteqarnerup kingunerisinnaasai suli naammaginatarmik paasisaqarfigineqanngimmata. Taamaattumik IMO-mi paasissutissanut tunngavissanik naammattunik peqalernissap qulakkeerneqarnissaa Naalakkersuisunit pingaartinneqarpoq.

**2. Naalakkersuisut HFO umiarsuarni nunatsinneersuni imartatsinniluunniit atornerarnera pillugu sunniutissanik misissuititsisimappat?**

**a. Nalunaarusiortitsisoqarsimappat nalunaarusiaq Inatsisartunut nassiunneqarsinnaava?**

Issittup Kalaallit Nunaannut tunngasortaani HFO-mik atuineranut inerteqquteqarnerup inuiaqatigiit aningaasaqarnerannut kingunerisassaanik misissueqqissaarnermut missingiummik suliaqartoqarpoq. Kisiannili missingiusiap taassuma suliarineqarnerata kingorna atuinerinnaq pinnagu, aammali Issittumi HFO-mik atuinissamut inerteqquteqalernissamut siunnersuummik IMO-mi saqqummiussisoqarpoq. Taamaattumik inuiaqatigiit aningaasaqarnerannut kingunerisassanik misissueqqissaarnermi tunngaviusut allannguuteqarsimapput. Maanna IMO-p ataani Issittup imartaani HFO-mik atuineranut assartuussinermullu inerteqquteqalernissamut misissueqqissaarnermik aallartitsisoqarpoq. Naalakkersuisut misissueqqissaarnerup taassuma inernerisassai utaqqivaat. Misissueqqissaarnerup piareeriarpat Inatsisartut Eqqissisimatitsinermut Avatangiisinullu Ataatsimiititaliaannut nassiunneqassaaq.

Brevdato: 24-07-2018  
Sagsnr.: 2018 - 14818  
Akt-id: 8300531

Postboks 1614  
3900 Nuuk  
Tlf. (+299) 34 50 00  
Fax (+299) 34 54 10  
E-mail: pan@nanoq.gl  
www.naalakkersuisut.gl

### **3. HFO-p imartatsinni, soorlu takornarissanik angallassinermi, atornerqarnerata annikillissarnissaanut Naalakkersuisut qanoq iliuuseqassamaarpat?**

Erseqqissaatigineqassaaq, imartami avatangiisinik illersuineq (killeqarfimmiit avammut 3 smilinut) kisimi immami avatangiisit illersorneqarnissaat pillugu Inatsisartut Inatsisaanni maleruagassiuunneqarmat, kiisalu imartap avataani sumiiffinnut maleruagassiuussinissamut oqartussaaffik danskinit tigummineqarluni. Inatsisartuni immami avatangiisinut inatsit nutaaq, 1. august 2017-imi atuutilersoq akuerineqarpoq. Tamatuma peqatigisaanik 1. januar 2018 aallarnerfigalugu imartap avataani sumiiffinnut immami avatangiisinut inatsit nutaaq atuutilerpoq. Inatsisit marluk taakku iliuuseqarnissamut maleruagassanik aalajangersaasinnaanermut aalajangersakkanik imaqarput, taakkunungalugu umiarsuarni silaannarmik mingutsitsinerup killilersorneqarnissaa siunertaralugu ikummatissamik atuinnermut piumasaqaatit ilaatinneqarput. Naalakkersuisut danskiteqartussaasui suleqatigalugit IMO-p Issittup imartaani ilaatigut HFO-mik atuinnermiit silaannarmik mingutsitsineq killilersorniarlugu piumasaqaatinik sukannerulersitsinissamut suliniutai malinnaaffigaat.

Maannarpiaq HFO-mik atuineq pillugu inaarutaasumik aalajangiisoqannginnerani, IMO-mi misissueqqissaarneq matuma siuliani taaneqartoq utaqqineqarpoq. Ataatsimut isigalugu Naalakkersuisut umiarsuit angallannerini silaannarmik mingutsitsinermik killilersuinissaq kissaatigaat, kisiannili tamatuma peqatigisaanik Issittumi aaqqiissutissanik ataatsimoorfiusunik assigiinnillu, ilaatigullu umiarsuit angallannerini assigiinnik atugassaqaartitsinissap eqqarsaateqarfiusunik suliaqartoqarnissaa pingaartillugu. Ataatsimut isigalugu ilaatigut umiarsuarnut tamanut atugassarititaasut assigiinnissaat qulakkeerniarlugu, umiarsuarnut assigiinngitsunut maleruagassanik assigiinnik maleruagassiuisoqarpoq. Taamaattumik assersuutigalugu taamaallaat umiarsuarnut sinersorlutik takornariartitsisartunut ikummatissat pillugit piumasaqaateqartoqassanersoq isumaliutigineqarsimangilaq.

### **4. Assersuutigalugu paamik NOx-millu umiarsuarnit aniatitsinernik annikillisaanissamut Naalakkersuisut qanoq pilersaaruteqarpat?**


Inatsisartut UPA 2017-imi imaani avatangiisinut inatsit nutaaq akuersissutigaat. Inatsit silaannarmik mingutsitsinissaq pillugu maleruagassanik nutaanik imaqarpoq. Maleruagassani nutaani ikummarsaatit NOx-illu umiarsuarniit aniatinneqartut pillugit maleruagassanik aalajangersaanissaq periarfissinneqarpoq.



## 5. Sammisaaq pillugu Naalakkersuisut allanik paasissutissaateqarpat?

Imaani avatangiisit inuiaqatigiinni innuttaasunut amerlasuunut pingaaruteqartorujussuupput. Taamaattumik Naalakkersuisut nunani tamalaani oqalliffiit Issittup imartaani avatangiisinik illersuinissaq pillugu oqallinnernut aalajangiisarnernullu pingaarnernut peqataasarput. Taakkununga ilatigitillugu Issittumi Siunnersuisooqatigiiffimmi suleqatigiissitaq PAME (Protection of the Arctic Marine Environment) taaneqarsinnaavoq. Issittumi HFO-nik tamanik atuinnaarnissap suliniutigineqarnissaa Naalakkersuisut piviusorsioortut isumaqarfigaat.

Inussiarnersumik inuulluaqqusillunga



Kim Kielsen